



王忠文公文集卷之一

鄱陽三臺劉傑編輯

廬陵銅溪劉同校正

賦

思親賦

天台陳君敬初幼孤事母盡孝壯歲遠遊所寓之室
因名曰白雲著思親也吾內翰黃先生既為作白雲
之辭同門友王禕復造斯賦焉賦曰 仰蒼旻之冥
漠運玄化之渾淪何賦授之殊致或偏頗而不均撫
予身之薄祐慨此生之多屯豈造物之見斯將受命

之匪辰歲越在乎稚齡倏棄捐乎嚴君曾志學之未
逮已過庭而無聞寄眇眇之弱植托微微之孤根灑
血淚於枯柏結哀號於愁雲痛蓼莪之既深幸菽水
之可樂調旨甘於修醴糝餘粒於藜藿躡積雪而筍
生斲層冰而鱗躍奉慈訓之溫恭承懿範之柔恪雖
罔極之莫忘固終養之有托急景不息芳年易徂曷
致三釜曷貴重墟恐令名之不振使先猷之弗舒奉
堂上之明命離膝下之深娛迺辭故里迺游名區薦
紳是從冠蓋爲徒擣麗藻於淮浙覲清光於皇都朗
節矯以遐奮蜚聲韡其旁敷嗟功名之踳躅慨日月

之居諸處違離以自適與憂憤而長俱眇丘園之雨
寂睠桑梓之雲腴烝嘗邈其弗逮溫清倏其久疏豈
初服之難返念夙素之已渝感風對以浩歎閔燧穀
而長吁至若青陽布和縉景騰美風揚柔飈日轉華
晷雖行樂而何歡恨承顏之非邇朱明啓節南薰奏
琴果散嘉實對聯芳陰枕炎蒸其孰理襟邑鬱而莫
任灑露宵零嚴霜晨被坂遠萎蘭隰空摧穗雁哀哀
以翔霄葉蕭蕭而墮地怵此日之苦思激往年之餘
涕玄冥臨御重陰涸寒蕭條微塞搖落鄉關日韜光
而弗曜川積凍而成乾伊天意之猶慘豈物情之能

歡矧予懷之含瘁固觸景而增酸撫四時之推移靡
一息之停緩年既迫於喜懼日且較乎長短指白雲
之在望緬丹丘之未遠遡歸風而効誠藉流月以寄
款倘微榮之可養固遠游之焉敢閔千祿以辭親曾
爲吏而踰險在往哲其猶然可吾儕之不勉誓至恩
之少酬期餘生之無忝持寸草之微心報春暉於未
晚懶設祭以報本烏反哺而効慈彼蠢蠢之細物亦
靈明而有知察妙理以彌戾曠大觀而遐思悵意長
而語短聊擘翰以陳詞

葯房賦

浦陽鄭仲舒讀書之室曰葯房友人王禕爲之賦蓋
美其好尚之修潔又以寓吾思慕之意云辭曰 夫
何美人之練要兮審好修以爲常既昭質之弗虧兮
又姱節之孔彰爰托物以自表兮曰清修之是將滋
幽蘭而樹蕙兮蘭爲佩而蕙爲纓褰薜荔以爲衣兮
集夫容以爲裳既所服之孔修兮粲芬芬其文章所
處欲其芳華兮又申之以葯房何斯房之結構兮獨
以葯而爲之薦芳馨之菲菲兮絢繁飾以陸離文杏
煥以成梁兮琢辛夷而爲楣檠木蘭之差差兮梳文
藻其紛披繚䟽牖以杜衡兮扈素壁以江離桂樹鬱

其當軒兮陰團團而成帷
隙百草爲庭實兮肆把玩
手瓊枝襲芸編以總總兮
緇空桑之朱絲餐繁英與
落葉兮飲沆瀣以自怡澹
逍遙以容與兮聊棲遲而
偃仰撫榮華之未艾兮
睠茲葑以自况維葑之澤兮
所以示昭質之匪飾也維
葑之馨兮所以表姱節之
不惑也朝夕處乎斯房兮
信修潔之不忘苟所好之
絕俗兮人不知其何傷方
世俗之溷濁兮糝薰蕕而
莫質蕭艾蔽乎中野兮
施某蔓其盈室彼惡檟果
何物兮亦雜然而充幃衆
舍是而尚非兮孰於芳其
能祗何美人之耿介兮乃
獨爲此度也夫豈傲世以自

異兮亦惟好修之故也委厥美以自棄兮固非其心之所安也使矯名而無實兮又胡若是拳拳也顧予生之侘傺兮曾靡求乎安處塊獨守此敝廬兮蓬蒿紛其環堵雖凝塵之滿席兮情晏然猶冲豫外物一無所徇兮曰惟德之爲馨異和順之中積兮致英華之外形徒潔修以自表兮媿非予之所能既好尚有不同兮又孰揆予之中情幸美人之嬋娟兮夙與予其目成欲相仍乎斯房兮恐莫堅乎芳盟命靈氛爲予筵筭兮靈氛告予以吉占曰外好雖不同兮實中情之可堅聞斯語以邑鬱兮恐佳期之遲莫思美人

而未見兮悵盤桓而延竚將何物以結言兮恨衆芳
之已萎采芳洲之杜若兮聊遺予之所思願相從而
相羊兮終歲晏以爲期慮誓言之未固兮結微情以
成詞

詠歸亭賦

爲沈仲說作

夫何若人之耿介兮志與俗其背馳絕紛華之外騫
兮壹冲澹以自怡守忠信以佩服兮被道義之光輝
豈修禊之徒事兮將聖賢以爲師睠笠澤之沃野兮
實若人之所居豈藏修之無所兮有厦屋之渠渠廓
閒田以開圃兮俯平川而結廬木參參以繞舍兮水

湯湯而循除爰有亭其新構兮謝雕甍與綺䟽旣琴
瑟之在前兮亦左圖而右書來良朋於遠方兮聊於
焉而樂娛揭亭名曰詠歸兮示聖門以爲徒仰聖門
之多賢兮各負材而懷器求藝能之孔多兮由剛勇
而尚義彼願試於爲國兮蓋同科於政事亦循循以
謙讓兮嘗適齊以通使彼小相之願爲兮亦量能以
自計迹三子之所志兮徇功名而規規何黠爾之曠
達兮獨從容以無爲謂我服之旣成兮屬暮春之芳
期集冠者及童子兮浴沂水之戲嬉遂風涼乎舞雩
兮同詠歌而乃歸唯所志之若斯兮斯脫略乎物累

弗舍已以從人兮殆春融而蟬蛻侔氣象於堯舜兮
同化工乎天地宜有契於聖心兮亟嘆賞而興喟念
去今踰千載兮孰此志之能承何若人之耿介兮乃
感慕以作興亦見道其庶幾兮匪惟飾乎修名繼寥
寥之絕響兮長詠歌于茲亭日遲遲以載陽兮雲油
油以成雨鳥和鳴以在樹兮魚群躍以在渚任衆情
之變化兮嘉萬彙之樂所撫物我之各適兮肆安居
而逸處彼世俗之溷隘兮固利名爲網羅衆群趨以
競進兮紛遑遑其謂何苟返求乎初服兮亦所得之
已多余俛俛之無類兮誓蹈道之弗頗微若人吾誰

與依兮願從游以靡他

四言詩

義烏播田詩 并序

至正十年浙東部使者言民役不均繇民田有不實
廼俾屬郡括其實以賦役且命有田者隨其田之所
在而受役真定范侯公琇遂被檄來蒞其事于義烏
義烏婺屬縣而侯實仕衢爲錄事衢婺異郡而檄侯
者慎重其事非其人不以諉之也侯蒞事精敏凡所
行科條具有繩墨以故令旣下而事易集法旣定而
民不爭竣事還衢縣民相與言曰侯之來部使者之

命也雖然所以易弊革奸引公示正使吾富者不敢私其逸而貧者得以遂其安者侯之惠也侯之惠在吾義烏曷有窮已吾黨之士苟暗無詩以誦其事將何以表吾感恩之意善於辭者盍聲爲詩於是王禕爲之詩曰

維縣義烏有腴其田昫昫原隰有陌有阡田則民有稅入于官歲取幾何石萬三千民之繇役視稅寡多維民之媮虛實以訛富累千百役僅一加貧或斗升顧同其科官有臬司視民孔明曰茲富貧弗均弗平宜括其實使無遁情役以稅差稅由籍徵維事之殷

匪才莫支孰以才稱范侯在衢臬司檄侯侯莫敢違義烏之事俾侯來尸侯來尸之躬其勞動凡民有田俾其自陳里胥載覈祖隰祖吟且稽故籍質其僞真鈎隱弗遺增崇弗逾既括而實廼籍廼圖圖籍既完弗繆弗汙按籍以役庠高用敷豪民大家繇兼役重單夫寡人獲免于庸富旣弗病貧將終豐民情載愉頌聲泯泯頌聲伊何民役孔均匪役之均惟侯之恩侯恩曷忘膏澤我身我身之餘施及于孫願侯毋行侯行不留豈惟我人人皆徯侯侯其行矣莫維侯舟我歌我詩以相民謳

婺州新城詩并序

婺濱谿爲城城重築於宋宣和間國朝以來圯壞弗葺久矣至正十二年中原倣擾南方繹騷江浙省臣豫備不虞非城郭不可下其事于列郡俾各完其故城浙東憲司實治於婺屬郡守亟遵行之然役鉅費殷揔其事者非才猷之優著不足以堪其任乃以諉處州青田縣尹葉侯侯至則合郡守與州縣之長吏定爲要束揣厚薄略基址使富民皆來受役庶民則輸錢致助焉城成其周一千四百八十丈高二尋有二尺而廣如之自春三月庀事至秋七月而遂訖工

蓋侯材裕識周濟之以威而本之以仁恕故揔是大役事旣集而民不病成功速而績可永於久婺之民乃相與告禕曰維是婺城葉侯之宣力至矣今侯且去而其績之在吾婺將與城相始終子盍作爲頌歌推美誦勤以道侯於無窮乎於是禕不敢辭而爲之詩詩曰

頌頌婺城十里其周昔圯今崇伊誰云謀謀夫雖多材則匪優憲司有命揔于葉侯侯來自括其政有捷乃頌役要乃定土法乃稽民籍第其乙甲庶民畢來遐邇爰發取土于隍取石于岡築之登登鼙鼓載揚

侯來戾止督我巡功載劬厥躬食息靡違自春徂秋
爲日凡百功以告成不緩不亟雉堞雲連樓櫓山植
旣壯旣嚴勢乃頡頏方役之興民訛孔騰侯曰爾民
爾毋卒爭凡今之爲圖爾于寧爾寧爾居其漬于成
城旣成矣民則具喜我有室家我有父子昔危莫保
今獲攸止匪侯我恩疇克臻此維古有言民心靡堅
可與樂成慮始則難維侯不疑事以卒完維侯不欺
民以卒安至堅者金不朽者石金石可毀孰載侯績
維侯之績有永無斁作此頌詩用播鄉國

存存齋爲沈仲說賦

理有太極至全而純厥分動靜曰爲陽陰化育之妙
運行無垠維帝降衷賦于下人凡人之生其稟匪殊
匪厚于聖匪薄于愚是謂成性至善弗渝存而又存
乃其本初道由此出義由此立存之之功彌久不息
維其不息與聖合德與天爲一天之庸民亦孔之明
如何愚人自戕其成幸茲哲人日夕戰兢尚克敬哉
以無忝爾所生

五言古詩

家居二首

家居華川上及此三百齡老桂蔽後堂長槐列前庭

槐陰夏散綠桂花冬留青重惟根本茂枝葉藉以榮
吾先久種德嘉種乃休徵撫躬良自愛遺蔭庶其承
東隣職胥吏西隣業屠沽酒炙日狼籍錢財肆求需
口體既華飽自謂樂有餘寧知生死間身與糞壤俱
鄙人有遠志屢空非所虞閉門臥風雨窮年理詩書
所憂道未至不得成名譽修名倘樹立千載以爲圖

寄贈申屠教諭

學官本閑曹博士非冗職人存政斯舉道在時乃適
卓哉申屠君令聞重珪璧耻隨茂才名羞蹈隱士跡
前年擢鄉書比者承省檄束帶主歛庠橫經擁師席

想見百里間文風變疇音大音姑小鳴深蓄那淺測
區區抱歆慕所恨未良覲願言執麟經與子相扣擊
他年老韓門敢用追湜籍

贈別高進道赴廣西憲府

舉酒且勿飲請君聽我歌我歌亦激烈君行莫蹉跎
聖主御宸極治道臻泰和文章布海隅玉帛來岩阿
人生邁新會鮮不自濯磨痛哭上賈策笑談決韓科
經濟一以展功名良亦多維君瑚璉器貴重含光華
持以薦清廟孰云或偏頗蕭條歲年晏坐使玄髮皤
終然崇溪精百鍊非有他憲府新辟椽簡書起嬋媿

及茲復自傲恐爾時已過由來九翮鳥猶值一目羅
勿謂行路難且對雙眉蛾桂林斂烟瘴炎海恬風次
道塗雖云遠行邁須逶迤爲君陳此詞比贈珊瑚柯

次韻孫道士思仙

我本仙中人所友皆飛仙飛仙亦何爲逍遙度遐年
飈輪朝蓬島羽駕夕葉淵周游無停蹤八極及九泉
口咀三危露手弄五色烟自從墮塵世不復肩期佺
念之恍如夢使我心茫然何當返初服凌虛恣孤鶩

贈別李千戶

丈夫生世間雖死期不朽寧令七尺軀泯沒百年後

聖主居九重太平日云父勾陳肅羽衛列象應星斗
柰何折衝具往往猶掣肘秦養空復勤驪黃紛牝牡
徭蠻昔梗化淮盜近興醜奇策殊不聞深恩詎堪負
桓桓李將軍仗節海隅守鐵甲縈綠縢金符縮朱紐
平生韜略書披繹長在手智勇未及宣青萍夜常吼
先王制夷夏武備殊不苟先事防不虞威聲讐飛走
馬援革果尸王羆箭如首一懷報國志爵祿隨亦厚
雙瓶送君別行旆依官柳贈言豈徒爲醉擊秦聲缶

常熟西郊

稻禾斂嘉實蘭蕙摧孤芳華滋日已歇遊子多慨慷

林臯集鳥雀畎畝散牛羊物情各有適心與歸雲翔
金德元西園宴集得第字

旭日散微暄喬林動清吹雖忻氣候佳頗覺衆芳悴
朋簪得稍盍客履隨所憇華年嗟易徂嘉會况難值
開尊引清觴有酒須盡醉情真略儀飭理會忘物議
維予二三子夙宿諧深契豈無西掖才未擢南宮第
淹時姑陸沉誰云果忘世獨憐飄泊蹤萍蓬渺根蒂
未知今日權明年復何地

鎮江望京峴山有作

艤舟大江口矯首峴京山山色近日曠洩雲護層巒

吾鄉忠簡公丘隴在其間嗚呼靖康亂九鼎紛播遷
建炎旣南狩國事已艱難公方任社稷百戰心力殫
神州將全璧抗疏請廻鸞大誼表日月衷言披膽肝
誰歟獨何心忍使棄中原星殞孔明死王業遂偏安
惟留忠誠節宇宙垂不刊遺墳托茲土孰敢樵牧干
客途有程期無由拜荆管遺武幸可蹈英風杳難攀
天昏白日落淒然洒清潛

登黃樓

昔讀黃樓賦頗疑過鋪張今晨獲登覽始覺詞致長
緬懷澶淵決彭城預為防千年文章守恩德在此鄉

只今河爲患居人極災傷誰爲任民社乃獨循故常
山川今如昔游子多慨慷長風城上來飛雨濕我裳
摩挲舊碑刻欲去重徬徨

贈別咎德明歸省

嗟我逼貧賤束書來京師長懷出門日含悽拜親闈
恐傷慈愛情忍淚不敢揮飄零靡所憫時拂身上衣
今晨與君別令我慘不怡念君富文采炯若珊瑚枝
成君未卒業如何遽言歸謂言非有他重此定省違
雖無毛義檄故有陽城規燕郊涼風動淮甸白雲飛
還家造膝下再拜獻酒卮綵衣舞且飲此藥孰與夷

人生適意少處世多睽離東門送子行薄言歌我辭
十一月七日出南城別陳三檢討

窮冬朔風怒冰霰滿城墮凌晨策我馬言送同心人
爲問將安之南轅返江津關河歲已晏胡不少逡巡
才高世所疾時昌命逾屯鸚鵡偶作賦畢方亦遭文
天地亦云廣寧不容子身子窮非我憂道在志須伸
所憂犯霜雪此行多苦辛平生離別淚爲子一沾巾
相期有後日去矣復何論

至正庚寅二月十六日同韓秀才發都門南
歸并懷陳檢討

漂雲散連陰旭日照畿甸百卉皆華滋青年倏流轉
駕言驅我車南還涉江漢帝鄉非不樂他適豈所願
平生抱區區期結明主春天關九重深先容孰吾
援低徊出都門顧闕情戀戀行矣徒自傷懷哉又誰
怨朋友幸知己祖道紛繾綣枉被軒冕崇飭此韋布
賤隕獲思故人風流逐時彥出處有素期離合足深
歎仰惟聖有訓學道貴無倦繼茲益自修敢待玄髮
變

贈別張舜俞

東南夥租賦富庶稱三吳吳田苦卑下浩渺平江湖

蓄害動連歲官府仍徵需紆餘脂膏地坐見民力枯
維時都水司職任在開疏朝家重民命務使疲瘠蘇
選官皆名卿興利多良圖張君實令器家世習文儒
三載爲列掾豈惟承簿書定膺贊畫間利澤能施敷
春風二三月行李赴皇都謂將謁天官序績待新
除驅車指河朔還涉徐濟墟洪河久爲患黔黎幾成
魚比聞用羣議極力事防虞兵民十數萬官吏千百
俱累月始就緒國費寧無虛雖云幸平復焉知久何
如水利子所習識見元非迂餘策須上獻庶以裨廟
謨鄙人處畎畝夙昔懷區區世故屬可歎贈言匪勤

渠

贈別彭仲愈分得水字

平生喜求友結托盡名士英游非不多落落鮮知己
夫君文章伯問學富經史大器須晚成至寶不輕市
相逢吳會間論議發蒙鄙未會神先交遽別情曷已
蕭條歲云徂飛雲遍千里江寒蟄魚龍路遠積烟水
離異未足嗟合并寧可擬獨懷同門朋爲我謝屠子
友怡齋爲東陽蔣伯康賦

鴻鴈動成序眷令長在原物情各有知人獨無弟昆
弟昆本一氣至愛心所根世媮俗云薄天性幾弗存

伐樹亦何恤閭墻或爲寃昭哉聖有訓有耳如無聞
東陽望蔣氏詩禮遺子孫昆弟篤友愛怡怡若春溫
我觀友怡訓爲爾陳此言匪爲蔣氏歌庶使薄俗敦
吳門贈凌秀才

我家華川上君住蘭江濱百里通一水恣是金華人
自我與君別三載幽燕住及此會吳門朱顏各如故
同爲異鄉客誼重情依依東風足攜手君何復言歸
歸去金華山日看好山色紫翠積夫容綠草眠白石
若逢牧羊子爲我寄深情莫令猿鶴怨行矣尋初盟

感興四首

清夜耿不寐仰看天象移天非有形體實乃列宿爲
列宿附天轉五星自參差日月復自行晝夜互東西
三者不相謀各各無停機坐使歲年邁令人嗟老衰
婦工務蠶桑農力勤稼穡人理此其本度用給衣食
丈夫生事疏壯大轉窮阨積學復績文將以代畊織
藝成無所售撫卷空太息千載倘可期豈憂寒饑逼
秋風戰庭樹落葉如敗兵觸目感時艱油然百憂生
四方晏安久一旦災禍興干戈半天下積骸比丘陵
天子仁如堯夙宵念蒼生無乃訐謨者法度徒紛更
致茲豈無由何時復承平嫠婦不卹緯智士若爲情

女貧適人難士窮事人易堂堂七尺軀道義非不貴
孰知一失身祿爵反爲累由來食人食有死心弗替
出門慎其隨大易著深義所以古達人隱約居亂世
我懷管幼安高風邈難繼

飲橫城蔣氏別墅

春華被衆卉巨細皆敷榮牡丹旣舒葩茶蘼亦含英
撫物惜芳景開筵暢塵縈時從石邊坐或復池上行
繁花轉侵袖垂條動鈎纓心會言屢忘理愜感忽生
游魚何洋洋鳴禽自嚶嚶悠哉行樂意契彼禽魚情

偶作

人言青雲路欲登元有梯古來功名士極力事攀躋
我身亦兩足我馬亦四蹄如何十年走猶復迷東西
乃知既得意青雲偶追隨寄語山中人好同白雲棲

贈徐生

丈夫貴問學有學身乃尊聖賢炳謨訓方冊幸具存
求之非有他所在用力勤譬如山下水其出初有源
盈科方浩浩遂作波濤翻又如玉在璞莫辨珉與璠
雕琢既成器字尹爛焯焯人身本一物不學復奚論
學成自見用不必事趨奔上焉爲國華下以大其門
我觀膏梁子志氣亦軒軒尋芳紫陌曉買笑青樓昏

年少誠足樂面墻將何言徐生英俊姿家世襲衣冠
結髮事書史終年不窺園螢囊暑夕照蠹簡霜晨緜
及茲重植立豈不培本根一朝功名至看爾高飛騫
我言厚勸子願子心毋諉

錢唐贈別姚卿

仲春苦淫雨彌月不停滴時時雷電交俄復飛霰積
滌雲甫開霽陽精仍剝蝕二氣豈錯行人心轉惶惑
維時錢唐上屬子有行役謂言將何之去作金華客
已脫郡曹羈姑從憲府辟金華實吾鄉比歲羅困厄
前年理城隍軍需更徵索斯民竭脂髓求殊未極

凶荒乃相繼斗粟無所糴紛紛田間農往往溝中瘠
只今隣境間從橫猶盜賊相望警烽燧道路動榛棘
誰歟司民命豈不懷怵惕不然遭數垂拯救果無策
風憲耳目司號令易闔闢况君有長材足以資贊畫
行聞疲瘵毗旋被撫摩力往哉勿躊躇及物事須亟
冥冥江花紅杳杳關樹黑歌我危苦辭壯子行邁色
功名貴自致奮發須有激獨憐飄泊蹤仰羨冥飛翼
十二月二十一日同堵無傲朱伯言郭公葵
過西湖至南屏山明日予將渡江東歸賦此
留別

北風有餘淒衆卉無留芬寥寥湖山際清游接歡欣
嗟我二三子平生歷多辛天道諒非遠如何久遭迍
幸茲稍憩息頗覺忘趨奔感今長慨積道舊鬱懷伸
世情日已變友誼古所敦歲晏各自愛母徒惜臨分
陳元禮太常以使事至錢唐三月十七日堵
無傲陳君從朱伯言陶中立韓與玉諸公西
湖同泛分韻得氣字

錢唐積雨餘景物散春媚時暉被原隰遠映皇華使
良晤愜久睽新情諧曩契朋儔集芳宴舉酒迭相慰
念昔天子都與君久留滯夜眠每連牀晨出時並轡

愛深均骨肉往往佩高誼別離未多年升沉遽殊勢
頌臺司禮樂子臧亦云貴况乃銜君命光采增意氣
騫騰誠足多會合初不易清歌送窈窕畫舫蕩空翠
庶洽平生歡聊盡今日醉持觴且徘徊臨風復獻歎
元禮奉 詔徵彭處士於崇安却歸永嘉省
親還京師撫事感時因集杜少陵詩四十韻
奉贈
南風作秋聲蒼茫雲霧浮客子中夜發烏啼滿城頭
長嘯宇宙間維時遭艱虞兵戈滿邊徼中原有驅除
天未厭戎馬積屍草木腥原野轉蕭瑟青山猶哭聲

紆餘膏脂地連雲列戰格園廬但蒿藜何由似平昔
貴人豈不仁不似問瘡痍萬里煩供給上官督有司
誅求何多門出師亦多門借問大將誰不獨卿相尊
羣盜何淹留慘淡壯士志激烈思時康銷兵鑄農器
聖心頗虛竚經緯固密勿豈在多殺傷實欲邦國活
子負經濟才久在王侯間文彩珊瑚鈎正直朱絲絃
帝曰大布衣使者來顏闔實籍長久計時議歸前列
詔從三殿出嚴程到須早征塗乃侵星挂席窮海島
名賢慎出處終媿巢與由未達善一身潛魚不銜鈎
故鄉有弟妹家貧仰母慈倚門固有望遠道素書稀

家鄉旣盪盡游子去日長人事多錯迕不如早還鄉
翳翳桑榆日白日照執袂超然歡笑同相對如夢寐
堂上會親戚久念與存忘三日共一筵一舉累十觴
無乃太匆忙今年又北歸浩蕩想幽薊公家有程期
世故莽相仍豈無濟時策賢豪贊經綸 天子正前
席勿爲新婚念平生感意氣努力輸肝膽騫騰坐可
致鄙人奉末眷別離已五年逍遙展良覲不敢墜周
旋送子清秋暮含淒向寥廓不得相追隨居然成漢
落艱難媿深情生別常惻惻有使即寄書慰我深相
憶

贈別陳希文北上

自予別京華荏苒經五載蕭條山林蹤時論寧復采
命蹇嗟事違藝微轉身忘空懷戀關心釣天夢猶每
茲晨送君行感慨覺殊倍羨君英邁姿早歲志湖海
俊辭何鏗鏗偉氣真磊磊平生經濟策欲以獻君宰
屬時旃艱難四郊尚多壘趙國仰魯連燕昭師郭隗
是事古則然于今豈無待君行勿躊躇玄髮容易改
壯士須特達鄙人愧庸猥昔年舊交游零落知誰在
音書久間闊迂慢豈予罪雲泥旣遼絕道路仍崑崙
臨岐難別淚那忍爲君灑

贈陳憲史之福建

夫君英妙姿家世聯仕籍弱齡濟烏臺所掌在文墨
致身已青雲騰譽如白璧序勞合優迂隨牒更遠役
七閩處南陲憲府堂堂闢君往試所長俯就列曹職
相逢錢唐濱秋風動行色嗟茲遘時艱天地滿兵革
嗚呼凋瘵昨何乃際斯厄生者困科差死者墮鋒鏑
貴人豈不仁胡不懷慘惻我觀得意者及是翻取適
旌旗出廣路百步人辟易假威濟誅求生事傲玉帛
高堂日置酒秉燭燕賓客芳除紅錦藉珍饈青紗幕
嬌歌絕艷舞女婦擁前席垂酣不上馬歡樂未知極
平生賈生志臨別長太息

紫雲山房爲王景周賦

華房敞虛明繡櫳聯綺䟽皓月粲瓊戶迴飈揚流蘇
其中棲祥雲淡蕩紛紆餘非卿亦非喬紫色燁以敷
亭亭忽爲蓋藹藹或成圖縹緲映白鶴依依覆丹爐
房中居者誰高標列仙臞春晨禮太乙秋夕朝玄虛
非無長年術亦有養生書逍遙度人世與天以爲徒

何當寄幽蹤謝此紅塵區

贈別黃仲恭同知之官餘姚

錦衣映朝日道路促征鞍
舜江水如鑑待君照容顏
還從得意處應念作官難

七月八日同季高渡江東歸述懷分得龕字
蚤年志湖海嘉遯非所甘
驅車燕趙北弭節吳越南
季子誇遠適虞卿勞負儋
謂將風翮翔詎能轍鱗淹
蹉跎歲云壯頗覺世事諳
致君術豈謬枉已意已慙
乃知兔株守殊勝虎穴探
遭時兵革興江淮戰方酣
日夜羽書急列城俱戒嚴
况茲錢唐俗險惡人何堪

千錢購斗粟累日食無鹽
吾徒事文翰不解從戎驂
客囊更羞澁愧乏黃金兼
歸歟豈不樂何待霜露沾
長揖別英游明發張雲帆
同行藉佳彥高誼中心銜
依依共蔬食霑霑接叢談
長路頓藍輿涼颺浮葛衫
原田畢新穫村釀如蜜甜
顧惟出處意幸子同酸鹹
子家峴山陽第宅深潭潭
藏書故可讀一一懸牙籤
稍須僕吾被相從坐山龕
世故易翻覆人情劇寒炎
殷勤亦何屬寶爾筆鋒銛

舟中口號

挽船上逆水欲進不得前
丈夫得意日何異下灘船

秋夜雙溪上對月懷故人

秋氣日以肅秋夜日以長蕭然清溪上對此明月光
月雖照我身豈能知我心我心亦何爲所思在所欽
嗟君玉雪姿與我同心期此月若照君君能不予思
感懷示城中一二同志

飛颺滌煩鬱散策步廣庭明月流素采照我六尺形
稍欣羣動息忽覺衆感并結髮事文翰夙志在功名
庶將爲國華亦復致親榮所望則已淺况乃不得成
屬時遽右武四海干戈興賈誼策豈迂劉蕢第弗登
悠悠年運徂促促世故嬰伏枕勸中夜撫躬慨平生

垂名有千載享壽無百齡嗟哉身外事孰重孰爲輕
惟當托名山理此羣聖經後聖倘可俟吾言庶其徵
九月廿三日同德基宿城西王莊敏公故宅
有作

長塘散寒菱老屋蔭喬木百年文獻家同此清夜宿
食非爲盤飧意在窺簡牘弄翰旣紛紜抽辭亦芳馥
論深理何玄情浹誼彌篤前修未寥寥勗哉繼遺躅
貢憲使持節閩中過蘭溪有詩留別次韻

風槩儀禁署詞華燁儒林暫持閩部節寧忘魏關心
薰風蘭江上弭楫舒煩衿念此違離遽徒令馳戀深

頗聞議環召當宁有俞音行膺紫泥詔旋獻丹屐箴
不才託末契終當侍華簪

十一月五日重登南溪蔣氏懷遠亭

石逕融積霜桐簷散霏烟良辰攜佳友登覽思悠然
青山如故人歷歷揖我前獨憐亭前松歲晚含清妍
昔至始過膝今來已齊肩撫物動深慨人生無百年
浮華易衰謝流序倏徂遷不朽或可托吾將企前賢
乙未歲家居不出偶讀淵明詩因集其句爲
一首曰歸田園
丈夫志四海驅役無停息榮華難久居歲月相催逼

縱浪大化中人生不滿百時駛不可稽前途漸就窄
吾生行歸休營已良有極念念動中懷行行向不惑
守拙歸園田貧居安稼穡司田眷有秋苗生滿阡陌
幽蘭生前庭灌木荒余宅閉門不復出何嘗失顯默
時還讀我書抗言譚在昔窮通靡攸慮我心固匪石
濁酒聊可恃素衿不可易懷此貞秀姿諒哉宜霜柏

贈別王季野判官入閩兼柬其弟季畊照磨

維王望閩中載德今奕世堂堂忠文公致身當宋季
道學承紫陽名位埒真魏忠愍實猶子全閩屬制置
天兵旣南征奉籍來附隸世皇重嘉歎仍託七閩

寄嗟哉日本後遺忠更昭晰是生清獻公犖犖公輔
器髫年擢縣宰弱歲膺閩貳敷歷叅大藩率用儒飭
吏廉名貴華皓重望壓同異英英羣公子金昆聯玉
季維君美無度梧竹含標致詞華丹鳳毛宦業皂鵬
翅譬如崑山玉不琢自純粹又如古干將苾采不可
闕自餘諸伯仲家業俱善繼僑居久中吳門閩擅崇
貴良由與美宅 先帝之所賜忽時遭艱危干戈遍
天地吳城甲江左曾是一朝棄嗟君脫虎口老幼得
攜累錢唐及金華亦是少安憇世塗仍多虞更作入
閩計喜茲新命放拔擢南劍倅南劍介閩關忠愍所
嘗治詎期未百年乃覩拜廳事頗聞故里間丘壟多
蕪廢畫錦人所誇行矣毋濡滯念昔陪英游十載托
深契時方樂承平南吳北燕薊春嬉並游鞭夜宴接
歌袂時時發吟咏倡和忘夢寐茲樂豈復得臨風起
獻歎黃塵障赤日驛道千里逝願言寶爾軀遠大自
今始慷慨丈夫懷悽惻兒女淚贈篇覺詞繁庶用爲
君慰

采夫容次韻荅友人

秋江夫容花豈不顏色好日夕霜露侵其柰容易老
花老不自知猶謂色無改愛花惟愛色莫恨人不采

涉江采芙蓉莫采芙蓉葢葢開猶耐久留以映秋水
妾家江水南君住江水北采花以寄君聊慰相思憶

哭蔣季高

丁酉七月初予作會稽客有人東陽來跨戶遺書尺
計音季高氏死矣就窀穸初聞意渾迷旋叩氣愈塞
此事豈有無此理誠叵測嗟嗟吾季高稟賦甚殊特
短小精悍姿英邁不可抑沉潛理義窟畢志究經籍
緒餘乃外發文辭舒蘊積粲然春葩敷湧若秋濤激
翱翔薦紳間聲譽比圭璧淵源本家傳法度由師得
庶培遠大業用趾綿衍澤人望嗟則然天道慨何極

華年未三十夭奪無乃亟譬如千里駒竟斃鹽車厄
又如荆山璞若碎樵斧擊此冤孰從訴此痛果難息
念昔與子交寒暑將十易子少吾所畏我長子所敵
大誼相切劘微辭共探剔異姓諧弟昆深交契金石
杖屨華川晨燈火南溪夕從容見古道歲晏期靡忒
薰風端陽節別子雙峴側臨岐亦何言彼此慎愛惜
豈期兩月別遽作千古隔雲深山水遙日落關塞黑
夢中欲見子精爽無處覓風塵屬浩蕩天地方偪仄
會歸執杯酒酌子泉下魄遡風一長慟洒淚滿胸臆

送宣十判官之平陽

疾風卷原野寒氣襲重裳送君茲晨別之官適平陽
羨君卓犖才本是青雲器英華映詞林相府早從事
得官髮已白無乃與願違庶推夙昔志出身匡時危
不觀今公卿徒然享豐祿視民如仇讐旋亦覆公餗
維溫實名郡平陽溫屬州其州經甲兵并邑成荒丘
匪君才有餘曷往濟危急諒哉忠厚心及是須澤物
君行到州境正及霜柑時豈惟有嘉政定復多新詩
惜君念君行臨別情繾綣願言益自勗修已在無倦
至正戊戌三月卜居青岩與同志分得行字
窮年困廛市愛此山中行出郊步稍遠入林懷已清

天地正福反歲月方崢嶸卜居樂深境歛迹逃浮榮
父矣采薇曲非歟浣花名肥遁豈初志冥棲亦真情
竚諧桂松契敢負猿鶴盟沉茲雙澗水可以濯吾纓
歲晏倘可託於焉寄平生

偕宋景濂戴叔能陪蔡士安韓思學游月泉
書院分得矣字

良晨盍華簪出郊餘二里精廬尋月泉散策稍游止
吾邦宋鉅儒厥有呂夫子淵源自濂洛述作偕經史
維時考亭翁志合道尤似律呂相倡宣規矩互模擬
傳緒斯有歸正學固如此茲土昔過化百世崇明祀

餘思猶藹然盛德非遠矣後生抱區區結髮蹈先軌
今游雖云樂車馬謝繁靡望遠登高丘臨幽玩清泚
仰惟古人意豈敢肆娛意仙華翠如削引領足頻跂

次韻奉荅林彥文叅謀

西風戒郊原百穀斂嘉秀屬茲樂豐登乃爾亂離遘
使節辱東臨敝邑素云陋驚心劇盜逼觸目編昨疚
匪資經營功世故孰匡楛鄙生非時須閉戶守迤逗
遯迹懷樊英著書擬劉晝布衣倘非窮吾將謝文繡
次韻友人山居秋日就述鄙懷八首
月出東嶺光風來西樹聲秋景倏然異令人心意驚

君子有所蘊不時終不鳴獨怜青鏡中白髮日夜生
白髮容易生况復聞秋砧觸物動深感此歲月深
子期詎堪鑄舉世誰知音取琴爲君彈請彈梁甫吟
梁甫不可追何由繼華躅永懷古達人未易食人粟
寧將七尺軀甘爾隱屠牧誰持明月珠却向窮塗哭
明珠有照乘其焰百尺長如何汙塗泥世人不得將
終然有時出奪月爭夜光至寶非可私獻之天子傍
憶昔天子都三載竟忘歸謂將拾功名所志非輕肥
翻然忽自悔自售古所譏歸來山中居坐看雙輪飛
山居亦何樂所樂在泉石盤桓撫松桂茲樂豈易得

白雲如飛鴻過眼時歷歷俯仰天地間孤蹤寄幽僻
幽僻青岩中結屋開荒畦羣山列左右雙澗鳴東西
蕭然守岑寂環堵蓬蒿齊兵戈徧天地吾將託冥棲
天下兵未息何當騁予懷富貴非可待少壯豈重來
百年亦偶爾千載真悠哉惟應抱遺經獨立山岩隈
鳳林鄉乃王氏初迂之地子孫散處旣久至
正戊戌兵戈擾攘余至鳳林訪諸宗族爲避
地之計因賦詩見意示子姓云

鳳林縣南鄙山僻田衍腴維婺望王氏吾祖始所居
子孫旣散處往往鄉相都綿延四百載餘裔猶紛敷

懸知本根茂枝葉自扶踈我家縣隅北去此兩舍塗
避地乃此來屬時正艱虞所來爲宗族豈以勢利趨
羣從相溫存恩意何厪渠謂言貸我粟亦復假我廬
而我懶生事俯仰缺所需未應造物者困此七尺軀
夔屈本求伸免歲非過圖重維首丘義詎敢昧厥初
尚思朝陽鳴瑞世諧貞符

襟詩十首

古人不可見古月還至今每因古時月得見古人心
月即有圓缺心非有存沒將心與月比光明祇如一
一日復一日一月復一月坐看明鏡中顏色曉夜別

五言古詩卷一
九
日夜不我與少壯能幾時寸陰倘不惜後悔將安追
天地最鉅物人身實至微身焉不自尊曷以配兩儀
仰惟古聖賢充實有光輝因憐蠢蠢徒鳥獸安須麋
讀書雖窮經學道在窮仁經通乃知至仁得斯成人
束髮吾有志辛苦今十春朝聞可夕死誰當負斯文
燈殘花猶結木爛菌方采物既就凋零秀氣終有在
惟人最靈明慎勿輕自待堂堂七尺軀不朽可千載
腐草幻熠燿光燄終不遐雀入水爲蛤及更混泥沙
根器本如此變化亦復爾不聞北溟鯤一舉三千里
鳳皇無竹實無以充朝飢麒麟遇畋夫乃比麋與麋

君子負道德不遇將奚爲所以魯中叟終身竟栖栖
人情本多欲外物相牽攻富貴恨不早功名恨難崇
孰知二物者轉盼春華空君看燈上蛾何以保其終
南園種藜莧北苑藝瓜薑食蔬豈不美淡薄味孔長
如何元相國胡椒積盈倉終然襪塞口徒死可憐傷
山枯因產玉川竭緣孕珠珠玉到人間禍胎不可除
脫粟足爲飯裂布足爲襦吾寧謝華好朴素以爲娛

雜賦七首

大化莽冥冥曜靈無停候往古復來今吾往渺何究
無始在我前無窮在我後其間僅閱世曾不百年久

百年亦頃刻彭聃詎云壽悲哉浮休身不及道傍埃
不學劉伯倫陶然付杯酒

窈窕青樓人二八多嬌艷朝朝明鏡中夫容婉生面
春花紅艷殘綠葉秋容變白髮日夜生衰莫如轉盼
所以學仙人形神每精鍊吸景制頽齡長生凡骨換
萬物何總總錯糅兩儀間人身亦一物於何較媿妍
古人有不朽身後貴名傳鴻勳懃惇史奧學在崇編
託茲以名世庶用垂不刊孰知竹帛壽不似金石堅
夙予秉微尚外慕俱棄捐獨持方寸心千載明月懸
驅車適秦京策馬來燕國所見何堂堂莫非侯與伯

甲第金張家乙觀王謝宅旌節出廣衢百步人辟易
威權自其口氣焰何烜赫安知公鍊傾反掌遂狼藉
魯連彼何人肆志寧自適

梧桐生巖陽下俯清澗潄柯葉雨露滋鳳凰宿其陰
稟材一何良裁作綠綺琴被以弦朱絲綴以徽黃金
澹然三尺中實涵太古心唐虞世已遠末代崇哇淫
匪無南風曲欲鼓孰知音

終朝飲醇酒舉杯易成醉終日讀古書撫卷不成寐
義理一何深歲月一何駛功名實外物山林乃吾事
昨夜西山雲秋雨生爽氣笑指二尺檠終當勿相棄

門前兩松樹千尺何青青白雲枝間宿縹緲姿態生
驚飈來吹拂復作笙竽聲物情豈有適偶爾相合并
須臾遂分散彼此各無情因之感世故超然欲忘形

夜坐擬古二首

新月如弓彎流星如箭長惜哉弓不弦况乃箭無鏃
借問羽林軍何以射天狼

織女居河西河東住牽牛柰此一水隔數會曾無由
精衛勿填海爲我填河流

三韻三篇

巨鳥有六翮大魚有重鬣回翔棲鄧林噴薄遊天池

終焉觸罔罟性命不自持

曲曲溪水流東折復西轉潭底一何深灘面一何淺
人心亦復然何從測夷險

青天青如石衆星粲光芒牽牛望織女旣駟馭玉良
誰其挽弧矢爲我射天狼

次韻劉先生古詩十首

元氣播羣彙雨露均沾濡洪纖各生成孰爲乘與除
物形自有偏造化無遺餘大道亦如是聖域同所徂
譬如挹樽酒置彼四達衢飲者隨爾量初何間親踈
人身叅三才盍思居廣居

我居固云廣我力敢不勤結髮爰有事外物視浮雲
分陰深所惜矻矻窮朝曠孰謂參也魯一貫乃獨聞
望道吾未見憂來心如熏彼哉夸毗子方將樹功勳
勳名旣以高禍患隨以至軒冕等桎梏古來同此事
象齒及翠毛茲身適爲累咄哉若而人生死如夢醉
古人吾焉從欲徃無兩翅

有翅亦安之且學斥鷃離栖遲一室間究觀古人書
誰云古人遠朝夕同我居其言有若此其心定何如
見心不見面令人發長吁
人心如人面觀人所宜慎古人心坦夷改過豈嘗吝

令人心險艱筆鋒作刀刃古今人不同光景同一瞬
置此勿多談且復談世運

世運有汗隆代謝由一氣人身固其中草木共榮悴
柰何桃李花顏色圖久媚所以特達人每灑英雄淚
百年未足憑千載當可覲

所覲身後名遺芬比猗蘭身焉匪金石詎傲霜雪寒
不朽苟有託年歲任其闌朝聞夕可死用力非無端
心至力靡逮撫膺徒慨嘆

慨嘆將何爲願言啓茅塞先生括蒼彥長髯漆光黑
平生守勁節枉直較尋尺著書三萬言石室豈寥寂

還攜青藜杖來作珠履客不才託末契承訓庶朝夕
朝夕操鉛刀而以親龍淵銳鈍固遼絕物類幸相連
斯文如一綫蕭條今可憐孰其任茲事迴瀾漲百川
念之心皇皇中宵不能眠

不眠亦何如如醉不能醒幡然披衣起仰視青天青
驚飈戒高林踈雨過廣庭秋意殊可攬河漢方西傾
徘徊復徘徊誰歟領茲情

性初余同門友也至正初定交錢唐及茲兩
紀中間出處離合之不同有足慨者頃辱以
先師黃文獻公所贈詩見示感今念昔撫卷

泫然因用次韻追和雖辭不能工而師友之
誼庶幾見之矣

憶昔與子游我齒始踰冠子年頗少我已復飽經傳
白璧信少雙明珠合同穿吾師文獻公清慎寡推薦
而獨敬愛子揄揚儕衆彥庶將托斯文豈特誇詞翰
緬思韓公門至者凡骨換其時籍湜輩抱璞爭自獻
何言百世下徽猷乃重見寥寥古道遠忽忽陳迹幻
我時事遠遊歷攬天下半三年客幽燕坐使黃金散
却歸巖穴底還覓青精飯惟子負奇才年長氣逾悍
不受世鞅羈歸釣東海岼誓終究遺經世累忘貴賤

王忠文公文集卷之一
鮫鱷者何爲騰克起清旦誰云屠龍手祇解挾書卷
揮劍剗其鬣腥雨灑流汗終然雖裂皆竟爾成解腕
遠害圖全身有足奔走健自茲十年來宰肉皆糜爛
我猶跼故園子乃處遐甸蹤跡無由聞頗類弦離箭
及是重盍簪各詫經喪亂故業共討論殊覺賢否判
子才雲錦機組織五色線待詔金鑿坡講經白虎觀
此事誠所優吾將迫衰晏遡風一泫然徒有情綫綫

王忠文公文集卷之一

